

Sra.Maca Flanegin y tanta Marisa

Orguyoso di nan nieto y sobrino Bernardo, participe den Formacion Social

Maca Flanegin ta wela orguyoso di Bernardo, un di e 12 hobennan cu a termina e prome fase di e proyecto Formacion Social na Mariniers Kazerne diabierna ultimo. Para banda di Parlamentario Lainya Westerhof, sra. Maca Flanegin y su yiu muher Marisa a conta dicon e programa social aki a trece un solucion pa nan nieto y sobrino.

Parlamentario Lainya Westerhof a expresa di ta hopi orguyoso di e hobennan cu 4 luna largo tabata bezig cu e training militar aki.

“Mi ta admira nan pa boluntariamente a bin aki pa cuminsa cu e trayecto y muestra tur hende cu nan por yega leu. Tambe mi ta contento di mira mayor y demas famia a bin aki pa apoya e muchanan. Mi ta spera cu esaki stimula otro hobennan pa bin inscribi pa un di e siguiente programanan di Formacion Social”.

Sra.Maca Flanegin a conta con orguyoso e ta di su nieto cu a caba hunto cu su amigonan e prome parti di e Formacion Social.

“Ora cu e aviso a sali den corant e nieto a bise: ‘Dudu, ami kier bay participa’ y ami a bise cu si e kier bay mi ta yude den esey.

Bernardo ta un hoben masha suave mes, pero e tabata un poco

lento y pesey e mester a bay EPB na San Nicolas.

E tempo ey e asunto di gang a lanta cabes y aunke e no tabata forma parti di ningun gang, pero ta di Sta.Cruz nan tabata buske problema”. Esaki tabata e motibo cu Maca, kende a cria Bernardo manera un yiu, a kite di scol. Cu awa na wowo Maca a bisa cu e tabatin miedo di perde su nieto stima. “Esaki tabata e solucion pa

Bernardo”.

E tanta di Bernardo, Marisa Flanegin a conta cu for di un prome instante tur hende a pusha Bernardo p’e por a cuminsa cu e programa aki. E tabata kier y nos tur a encurashe.

“Tur e stapnan di Bernardo aki mi a sigui di cerca. Mi ta trece y buske y tur dia mi ta puntre con su dia a bay. Nos a ripara un cambio grandi den dje tambe. Di un mucha keto, el a bira un persona cu

ta comunica mas. Mi ta haya cu e proyecto aki mester sigui. E ta bon pa e hubentud di Aruba”.

Nan ta gradici Gobierno di Aruba cu a bin cu e proyecto Formacion Social cu den caso di Bernardo a yuda masha tanto mes den su formacion. Awor ta keda na Bernardo pa sigui riba e bon caminda pa termina loke el a cunimsa y haya un trabou pa un dia e ta para riba su propio pia.

